



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim TAPAK 8

Pak police-i Imran Khan anema kiralongraba ken o benok

Carlos Alcaraz-i Indian Wells asayamung kokogo



VOL. XX NO. 158 (ADOK 158) DIMAPUR SANGTENNÜ (TUESDAY) METSÜREMI (MARCH) 21, 2023 ₹ 5.00

## Ao Senden & Rengma Hoho-i ULBs election magizüker

**Dimapur, March 20, 2023 (TYO):** State Election Commission of Nagaland-i March 9, 2023 nü Municipal aser Town Councils indang election agitsü sangdongba magizüker, ta Ao Senden-i metetdaksüogo.

State Election Commission-i Nagaland nung alirtem taginüba anema iba sangdong agitsüogo aser tashiyim mapa ka asünung Ao Senden-i magizüker, ta Tir Chubawati Longchar aser Tongti Tezulur Imtipokyim nati sangdong ka nung ashi.

March 20, 2023 nü Ao Senden indang Executive Council senden amendang May 30, 2017 nü Nagaland Municipal Act 2001 yanglushitsü atema Nagaland sorkar nem memorandum agitsüba nung masetshitsü lemtet.

Indian Constitution nung lateta aliba ama Naga nung temetentem kümzüka aser wazüka ayutsü atema Nagaland Municipal Act 2001 meyanglushi tashi Aor lushi nung ULB election magidaksütsü Ao Senden-isa

bangjemtepogo.

Sorkari tashiyim agi ULB election agitsüsa kümra Naga nung temetentem mechi nung Aor senso shinga nem-a shilem magidaksütsü bangzüngogo ta Chubawati aser Chubawati nati ashi.

Ano, Rengma Hoho-ia tanga sangdong ka nung 2016 küm bangzünga aliba nungi parnok masetshii noktaka aliba metetdaksüogo.

Sorkari Nagaland Municipal Act 2001 nung Section 120 & 123 "Tax on Lands and Buildings" magien tashi Tseminyu District kübok Town Election nung Rengma nung shinga shilem magidaksütsü ta President Pollem Tep aser General Secretary Sinhilo Thongseb nati sangdong nung shia lir.

Rengma Hoho-i 74th Amendment Act 1992 (iv) "Reservation of seats" pusemer aser Nagaland sorkari Constitution of India nung Arrla 371 (a) mezüngdoktsü imlar, ta mendenpurtemisa ashi.

## 1986 nung taküm bendanga agütsür kaketshirtem NSF-i tushi

**Kohima, March 20, 2023 (TYO):** Naga Students' Federation (NSF)-i Hombarnü 37 buba Martyrs' Day mongogo.

1986 küm kaketshir ana tepsetba- Kohima Village nungi Lt. Kekuojalie Sachu aser Kigwema Village nungi Lt. Vikhozo Yhoshü na bilemteta tetushi agitsü.

Iba sentong ya NSF Martyrs' Park nung agi aser NSF den kaketshir ana kinungertem Naga Peoples' Movement for Human Right züngsemtemi shilem agi.

"Indo-Burma arrtsü kilometer 5 nungi 20 tashi nung Disturbed Areas Act (DAA) atsülangba aser Nagaland nung Indian Police Service cadre tenzüka anema March 20, 1986 nü NSF-i ayongba sentong nung kaketshirtem yaria lungkak aйдang Alichen nungi armed police forces-i asür Sachu aser asür Yhoshü na khaset" ta NSF president Kegwayhun Tep-i ashi.

"Iba ya küm 37 tejakdang atalok aser iba mapang Naga nung yimtenren tia tamajung

aser tarutsü komala ka ajurutsü ta asüba tensa nung liasü. Iba ama tammang mapang ka nung NSF-i yimdong nung lungkak ait aser tapayutsü taküm ana sama" ta Tep-isa ashi.

"Ajisüaka akhümket nübo anati taküm bendanga agitsüba ajanga Naga nung taginübatem aser teimlatem asentenshi. Nükla aser nükjidong tejangja ka tsütsü tasen kümshii aser ibaji yimjung atema lir. Naga nung ajaki iba asoshi sarasademer aser aginür" ta paisa metetdaksü.

"Akhümket nübo anati taküm bendanga agitsüba ya putiotsü nung teti alitsü aser iba ajanga Naga nung lanurtem aser tarutsü pututem maneni ajungmesotsü" ta NSF President-isa ashi.

Iba sentong nung mendenji NSF secretary social & culture Benjong Longchar liasü, secretary information & publicity Mteisuding-i temoatsü meshia sarasademer aser secretary education Medovi Rhi-i ankiup tepela o jembi.

## Advisor Tovihoto-i BJP chief whip inyaksü

**Dimapur, March 20, 2023 (TYO):** 14 buba Nagaland Legislative Assembly nung BJP indang chief whip inyaksü atema H Tovihoto Ayemi shimogo.

Nagaland state BJP president, Temjen Imna Along-i chief whip

inyaksü atema Tribal Affairs and Election Advisor Tovihoto shim. March 19, 2022 nü Deputy CM aser BJP Legislature Party leader Y Patton'er kidang senden amendang iba lemtet agia liasü.

Tovihoto Ayemi ya Dimapur-I constituency nungi MLA lir.

## 14 buba NLA indang mezüngbuba session tenzüko Sharingain Longkumer-i maneni Speaker inyaksü



(Abelen nungi) NLA speaker Sharingain Longkumer, Salhoutuonuo Kruse aser Hekhani Jakhalu.



**Kohima, March 20, 2023 (TYO):** 14 buba Nagaland Legislative Assembly (NLA) indang mezüngbuba session tenzüko.

NDPP aser BJP adenba People's Democratic Alliance (PDA) sorkar kümsük tanabuba atema iba ya mezüngbuba budget session lir. Chief Minister Neiphiu Rio den deputy chief minister ana-TR Zeliang aser Y. Patton nung lenisüba kübok session agir.

Hombarnü protem speaker Mhathung Yanthan-i züngsem 59 nem tezüngzüktep agidakja liasü. Parnok rongnung nisung 29-i tang mezüng atema MLA inyaker.

Anosa, Nagaland Assembly nung tang mezüng atema tetsür MLA ana- Salhoutuonuo Kruse aser Hekhani Jakhalu na lir.

PDA sorkar kümsük tanabuba nung tambusangji arishi küm 87 tain NDPP MLA Noke Wangnao lir. Pai 1974 nungi tenzüker NLA kümsük 10 buba nung MLA inyaker. Külen, tanubosangji NLA speaker

Sharingain Longkumer (42) lir.

Tanü Pro-tem speaker Yanthan-i January 7 nü taoba MLA Dr Imtiwapang Aier asüba bilemtet.

People's Democratic Alliance (PDA) nominee Sharingain Longkumer-i kümsük tanabuba atema Speaker inyaksü shim.

Mokokchung district kübok Aonglenden Assembly Constituency nungi Sharingain-i tang agi tanabenbuba NDPP candidate ka ama takok ngua liasü.

Taoba MLA Imtikumzuk asüba sülen May 2019 by-election nung Sharingain-i takok angu.

PDA sorkar nung NDPP-BJP züngsem 37 lir saka tanga political party temi 'letter of support' agitsüba ajanga opposition bench mali.

Tanüngba political party temji NCP nungi MLA 7, NPP nungi 5, LJP (Ram Vilas), Naga People's Front (NPF) o Republican Party of India

(Athawale) nungi anana (2), JD(U) nungi 1 aser Independent MLA 4 lir.

14 buba NLA Speaker atema Sharingain dak alaka nisung shingaia tenüng magitsü aser iba jagi pro-tem speaker Yanthan-i pa shimba osang sangoktsü.

"Sharingain Longkumer-i taoba 13 buba Assembly kanga junga ketdangsuogo. Iba jagi onoki pa nem maneni Speaker inyaksü mapa nungloktür" ta Chief Minister Rio-i ashi.

"Nagaland nung alirtemi 14 buba NLA nung züngsem asütsü maongka agüja MLA 60 shimba atema pelar" ta Chief Minister-isa ashi.

Maneni Rio-isa mezüngbuba tetsür MLA tem- Salhoutuonuo Kruse aser Hekhani Jakhalu Kense na nem tenüngsang agitsü.

CM Rio-i anir züngsem ajaki pa dak temulung lema kümsük tanabuba atema Speaker inyaksü shimba atema pelaba Sharingain Longkumer-ia ashi.

## APO tashi angaa Mao nung noktanga agiener: SAPO

**Dimapur, March 20, 2023 (TYO):** Southern Angami Public Organisation (SAPO)-i March 21, 2023 nungi Mao nung noktanga agientsü.

Angami Public Organisation (APO)-i ashiba anga SAPO-i iba telemteba agiogo.

March 17, 2023 nü APO Extra-ordinary Meeting ka amendang APO-i SAPO indang ken o parnoki agitsü lemtet.

Manipur sorkari Armed Forces lezmüksüba aser

ashishitep aliba Kezolta nung CrPC 144 ozüng agitsüba anema SAPO-i parnok lushi adena Mao nung mesenzüdaksütsü lemtet.

SAPO-i December 15, 2022 ayaterm nung tenzüker March 20, 2023 tashi Mao nung noktanga.

Manipur sorkari Nagaland kübok Mao nung lushi Okhro Ikhro nung Cherry Blossom Festival ayonga amongba, Manipur Government School lapokba mesüra tanga Manipur

sorkari teyari agüja inyakba mapatongtem anema SAPO-i kodanga menokdak.

Külen, Nagaland sorkaria Mao nung ali kiburtem nem T. B. Hospital Khuzama, Nagaland nung sorkar mapa 16 agitsü aser Arrla 371(A) ajanga tenokdangbatem liaka külem Naga nung ta asüba tangatetba nung tanga teyaritem agitsüogo, ta SAPO President Er. Tepul Hopovi aser General Secretary Swelul Pucho nati sangdong ka nung ashi.

## NLA nung 'All Political Party Lobby' jateta lir

**Kohima, March 20, 2023 (TYO):** 14 buba Nagaland Legislative Assembly (NLA) nung züngsem 60 prong 'All Political Party Lobby' ka ama kümaka all-party government ta mesangdong lir.

Taküm assembly election nung NDPP-BJP tsüngda election jakdang menden 40:20 lemsar toktepa liasü. Züngsem 60 agi akümba assembly nung parnoki menden 37 nung takok angu.

Ajisüaka, tanga political party nungi züngsem 23-i opposition maliba sorkar ka akümtsü atema Chief Minister Rio pusema nungitsü lemtetogo.

MLA tem ya NCP nungi 7, NPP nungi 5, LJP (Ram Vilas), Naga People's Front (NPF) & RPI (Athawale) nungi anana (2), JD(U) nungi 1 aser Independent 4 lir.

March 18, 2023 nü CM Rio-i political party balala nungi MLA tem den ajurutepa senden ka

amen aser idangji parnoki sorkar nungitba shiditem agizükba metetdaksü, saka all-party mesüra opposition-less government indang tatembang osang kecha mali.

Ajisüaka, 14 buba NLA mezüngbuba session tenzüka anogo MLA tem indang takdangtemji "All Political Party Lobby" ta zülua lir kechiyong taoba mapang Treasury mesüra Opposition lobby ta lemsaa amshigo.

### IMDH Mokokchung nung Cataract surgery eye camp ayongzük



**Dimapur, Metsüremi/March 20 (TYO):** National Programme for Control of Blindness and Visual Impairment (NPCB & VI) Nagaland ajanga IMDH Mokokchung nung anogo pongu tashi angati Cataract surgery eye camp ayongzük liasü, koba March 14, 2023 nü

tenzük aser March 18, 2023 nü tembang. Iba camp nung Dr. Phyantsuthung, Consultant Eye Specialist, District Hospital Tuensang ajanga shiranger 18 atema cataract surgery 23 agia liasü. Kasa mapang Dr. Renjano N Okhyopvui, Medical Officer,

IMDH, Mokokchung lenisüba kübok team kati arishi küm 40 nungi tema nisung 160 dak Cataract aser Glaucoma screening agia liasü. Iba camp ya nüburtemi aginüba ama aser nüngdakapur nem cataract surgery agütsütsü nükjidong nung ayongzük liasü.

### Kohima nung Poshan Pakhwada 2023 tenzükogo

**Dimapur, Metsüremi/March 20 (TYO):** Poshan Pakhwada 2023 benjongmung Kohima nung March 20, 2023 nü tenzükogo. Poshan Pakhwada 2023 nungya district nung block level nung inyakyim balala March 20 nungi April 3, 2023 tashi alitsü aser iba mapang omen asem - Promotion and popularization of Shree Anna/millets for nutritional wellbeing; Celebration of Swasth Balak Spardha aser Popularizing Saksham Anganwadis - nung ajemdaker amungtsü.

Deputy Commissioner Kohima Shanavas C IAS ajanga department dang sendaka aliba department ajunga den amalitep akatsü aser district nung iba sentong takok ngua agitettsüsa shilem agitsü ayongzük. Paisa iba sentong ayongzükba department dang sentong tembangba sülen inyakyim report den noksa agütsütsü ashi. "Millet for Nutritional Wellbeing" omen kübok temang junga alitsü aser tetsür mashisa, teinlonglong tetsürtem aser

tanurtem dak rangloker sentong balala March 21 nungi 25, 2023 anogotem agitsü. "Celebration of Swasth Balak Spardha" kübok nutritional education atema kiboksem aotsü, healthy baby show aser anaemia camp tem March 27-30, 2023 anogotem agitsü. "Saksham Anganwadis" omen kübok AWC nung mürekmeju sentong agitsü, teka shidokba nung rangloker seminar ayongzüktsü aser best performing grassroot level worker nem sempet agütsütsü.

### Mokokchung nung World Oral Health Day mungogo



**Dimapur, Metsüremi/March 20 (TYO):** Linük ajunga den külemi National Oral Health Programme (NOHP) Mokokchung ajanga "Be proud of your mouth" omen nung ajemdaker Government Middle School Kumlong, Mokokchung nung March 20, 2023 nü World Oral Health Day munga liasü. Iba sentong nung temang anema ayutsü indang jembiba mapang Dr. Sentirenla, Dental Surgeon, IMDH Mokokchung ajanga Oral health ya temang ajak atema window lir, ta ashi.

Lai iba mapang oral hygiene nung temolung agütsütsü, senzika yutsüba ajanga timtem agütsüba aser moko ajanga oral health nung timtem agütsüba indang jembiba liasü. Lai kaketshir dang oral hygiene shidak amshitsü asoshi tepo meyoba yimyatem sayua liasü. Kasa mapang kaketshir nem toothbrush aser tooth paste densema oral hygiene kit angati lema agüja liasü. Iba anogomung nüngtem nung essay writing aser painting tetoktepa school

nung ayongzük liasü. Essay zülutepba nung Calss 8 nungi Pukhio-i mezüngbuba jenjang ngutet, Class 6 nungi Nokgen-i tanabuba jenjang nguteta liasü. Maneni Class 8 nungi Chongkoi aser Class 6 nungi Chongkimang nem consolation prizes agüja liasü. Painting tetoktepa nung Class 4 nungi Therali Kikon-i mezüngbuba jenjang aser Class 5 nungi Tsuyeh-i tanabuba jenjang nguteta liasü. Ano Class 5 nungi Chulem aser Class 5 nungi Bangmai na nem consolation prizes agüja liasü.

### 78 Bn CRPF ajanga Civic Action Programm ayongzük

**Dimapur, Metsüremi/March 20 (TYO):** Sechuma yimdak lanurtem nem computer training ajanga human resources yangerdaktsütsü aser Sechuma-Zubza yimdak makamaiter aluyimer yaritsü nükjidong nung 78 Bn CRPF Zubza ajanga Desktop Computer ana den yangji sendaka aliba osettem, multi functional printer aser kotarang den tesang, Pick axe aser Digging Rod (Crow Bar) densema alu nung amshiba osettem alia agütsü.

Desktop computer den yangji sendaka aliba oset aser printer ya Sechuma-Zubza village council nem amoktsü aser alu nung amshiba osettsüset ya makamaiter nem amokja liasü. Item oset agütsütsü asoshi March 20, 2023 nü Sechuma-Zubza nung Civic Action Programme ka ayongzük liasü, kong 78 Bn CRPF nungi officers aser sepaitem aser Sechuma-Zubza nungi village council züngsem aser yimdaklirtem dena liasü.

### AR-i Zunheboto nung Security senden ka ayongzük



**Dimapur, Metsüremi/March 20 (TYO):** Inspector General (North) kübok Assam Rifles, Miao Battalion 25 Sector AR ajanga March 20, 2023 nü Zunheboto Town indang GB tem den Security senden ka mena liasü.

Iba mapang GB tem ya yimtsüng ka nung yimjung yanglur lir aser ozüing alema inyaksangshiba, tim masüba mapa inyakba, tashiyim amshia senotsü meshiba azüoktsü asoshi Assam Rifles tem den teti adentsü, ta ashi.

Iba senden indang onük tongtipangtibaji General Assembly Elections 2023 matongdang aser agiba sülen security tensa asadangtsü atema liasü. Iba senden ajanga parnoki junga masadanga tensa tali tejangjaba nung asadanga mera balala agitsü renemtsü. Iba senden nung yimtsüng balala 13 nungi GBs 18 dena

Army aser nüburttem tsüngta apular ama Assam Rifles temi iba ama sentong ayongzükba atema parnoki pelaba lemsatepa liasü. GBs temi shilem agiba atema Assam Rifles temia pelaba lemsatep aser Assam Rifles tem teti nüburttem den nokdaksü ta ashi aser tarutsü anogotem nunga amalitep akatsü ayongzük liasü.

### State ajunga nung moko achiba tebilemstü tulu lir

**Dimapur, Metsüremi/March 20 (TYO):** Moko achir tali akumba ajanga state nung iba dak sendakba tashidak tali adoka aser rongsenketzüng tsütsü tebilemstü ajurua tanü lokti kanga akoksar aser memonui nüburttemi moko (tobacco) ajanga timtem agütsüba anema nokdaksüla. National Tobacco Control Program ajanga moko agi yangluba oset achiba ajanga timtem adokdaksüba indang awareness sentongtem kaket reju, arogo aser nüburttem dang agüja maparen balala inyaker.

memelar. Department ajanga Juvenile Justice Care and Protection of Children Act 2015 indang Section 77 nung mela aliba ozüngtem amshitsü meranger. Iba ozüing yagi tanur nem temesepba yi, narcotic drugs mesüra moko agi yangluba osettem mesüra psychotropic substance tem medical practitioner tejangjai agütsüba dak alaka dangari agütsüba nokdang aser aibelener tem tepuokdak küm tenet tashi ayur mesüra sen lakh ka tashi senchi achitsü mela lir.

District ajunga nung District Tobacco Control Cells ajanga mapang shia COTPA 2003 indang ozüngtem mapa kuma inyaka arur. COTPA 2003 ya ajanga state tobacco control cell-i Section-4 nung temolung agütsür, kobai public places, offices aser mapa inyakba tesem nung moko machirtem dak timtem agütsüba nungi kumzüktsü mechi nüburi amshiba tesem nung moko achiba nokdang. Section 6 (a) ajanga arishi küm 18 nungi teküpok nem moko agi yangluba oset ayokba nokdang, Section 6 (b) ajanga kaket reju temeket meter 100 nung mok agi yangluba osettem ayoktsü

Iba mapa inyaksü asoshi sub-inspector of police mesüra danga department nung iba den sako rank aliba officer nem melar. Dr. Arenla Walling, Deputy Director aser State nodal officer NTCP ajanga ashiba agi, asen lokti nung aser talisa lanurtem asoshi moko ya tebilemstü tulu kumogo, saka COTPA 2003 kübok moko ayokba meshi meshia nokdanga mali. Temelaba agüja aliba ketdangsür dak alaka department-ia 'third party' shinga nema iba ozüing amshitsü shia mali aser yamaji lira, yangji department shilem kecha mali, ta laisa metetdaksü.



March 20, 2023 nü Rajghat, New Delhi nung Japan Ato kilonser, Fumio Kishida-i Mahatma Gandhi nem akhüm agütsüba noksa nung angur.

## India aser Japan nati tesen-daktep tashi itshitsü bangjemogo

**New Delhi, Metsüremi/March 20 (Agencies):** Hombarnü Ato kilonser, Narendra Modi aser Japan Ato kilonser, Fumio Kishida nati India-Japan global strategic partnership tashi itshitsü bangjemogo; Indo-Pacific region nung yimjung den tesünep alitsü aser azükarutsü atema ibaji tongtibang, iba dak alia partnership tashi itshiba ajanga linük anaprongla lenla aika nung tajangzük angutsü, ta metetdaksü.

Japan Ato kilonser Hombarnep Delhi tonga aru. Tang Ukraine nung rara aliba ajanga alima tensa majungba aser Indo-Pacific nung China-i ambangyima inyakba mapang ka nung Japan leniri ghonda 27 shi India semdang.

Osangbenertem den jembidang Modi-i, G20 nung India

Tir asüba mapang aser G7 nung Japan mendenbuba asüba mapang nung alima ajungtsü atema inyaksü asoshi linük anaprongla atema maongka tajungtibaji tang mapang ya lir, ta ashi.

Modi-i, India-Japan Special strategic & global partnership ya democratic tangatbatem nung amenoka lir aser ibaji Indo-Pacific atema-a tongtibang, ta ashi.

Modi-isa, iba senden nung linük ana tsüngda tesendaktep jenjang asadangogo, talisa defence, digital technology, shishilembaba, investment aser health tsütsü amalitep jenjang repringshio, ta metetdaksü.

Osangbenertem den jembidang Kishida-i, Japan-i New Delhi den rongsenkettzüng tsütsü amalitepa inyakba jenjang tajungba akümer; yamaji Japan-i maneni India terenlok atema

nungitba dang masü saka Japan atema-a rongsenkettzüng tsütsü maongka angutsü, ta ashi.

Japan lenirisa, taküem May ita nung Japan nung ayongzükba G7 summit nung adentsü atema pai Modi jaokogo aser Modi-ia agizükogo, ta metetdaksü.

Yaküm March ita nunga India semdangba mapang nung Kishida-i, taruba küm 5 tsüngda Japan-i India nung Yen sen trillion 5 (India nung senbo crore 3,20,000) invest asütsü, ta sangdonga liasü.

2000 küm India aser Japan na tsüngda 'Global Partnership' yanglua liasü, 2006 küm 'Strategic & Global Partnership' yanglu aser 2014 küm 'Special Strategic & Global Partnership' yanglua liasü.

Yaküm India aser Japan na tsüngda shishilembabaji dollar sen billion 20.75 liasü.

## SC-i Centre dang sangküm Feb 28 tashi nung OROP ajak agüjang ta tuyu

**New Delhi, March 20 (Agencies):** One Rank One Pension (OROP) scheme atema 2022 küm Supreme Court-i tuyuba ama Centre sorkari mapa küma inyaksüla, ta shia Hombarnü Supreme Court-i sorkar dang, sangküm February 28 tashi nung pensioner lakh 10-11 nem tagütsütsü aliba sen ajak installment asem lemsar agüjang, ta tuyuogo.

Supreme Court-i sorkar dang, arrshi küm 70 ser temapurtem nem taküm June 23 tashi nung instalment ka mesüra iba dak tali lemsar tagütsütsü aliba OROP sen ajak agüjang aser April 30 tashi nung pensioner kibong lakh 6 den Gallantry Award angurtem nem OROP arrears ajak agüjang, ta tuyu.

Indian Ex-Servicemen Movement (IESM)-i Supreme Court dang sepai nungi anisüngzüker alirtem nem OROP arrears agütsütsü atema mepishiba ken o ka angadanga sülen SC-i item tetuyuba agütsüogo.

OROP arrears ken o dak sendakba nung Centre sorkari Supreme Court nem shidi

mabanger agütsüba ashishia Hombarnü Chief Justice, D Y Chandrachud-i, "Mabanger agütsüba shidiji ni ashishir. Court nungbo teladak asütsüla. Yangi (court) kechi miimshitsü ali?" ta asüngdang.

Shidi mabanger agütsüba yimya ya anenadoktsüla, ta shia D Y Chandrachud den Justices-P S Narasimha aser J B Pardiwala nungeri akümba bench-i, "Shidi mabanger agütsüba ya ochi obendang inyakyim den meputep," ta metetdaksü.

Tamalen Defence ministry-i, OROP arrears ji half-yearly instalment pezü küma lemsar agütsütsü, ta sangdonga liasü saka court-i iba sangdongji agienang, ta tuyu.

March 13 nü Chief Justice of India, D Y Chandrachud-i aniba bench-i Attorney General, R Venkataramani dang, "Defence ministry-i parnok ket nung ozüng amshitsü makok. January 20 nü agütsüba sangdongji agienang, kechiyong ibaji onoki agütsüba tetuyuba ama masü, mesüra secretary defence dang court-i arutsü metetdakjang," ta oshidang agüja liasü.



March 20, 2023 nü Jammu district nung Jammu & Kashmir National Conference tatong Tir, Omar Abdullah-i lokti senden ka nung jembidang tangokba noksa nung angur.

## Khalistani pusemertemi San Francisco nung Indian Consulate amak

**Washington, March 20 (Agencies):** Khalistani pusema longkak aitertemi San Francisco nung aliba Indian Consulate amak; Amongnü longkak aitertem jagi Indian Consulate amakba sülen Indian-American nungertemi aibelenertem nem temerenshi agüjang, ta takhangba agütsüogo.

Foundation for India and Indian Diaspora Studies (FIIDS)-i, "London aser San Francisco naprongla nung tensa mazüoktetba ajanga onok süngmanger, kechiyong yimti anaprongla nungji Separatists kari India nunger diplomatic missions maakogo," ta metetdaksü.

Khalistan pusemba yimiyim ayima longkak aitertem jagi police-i ayuba security atsu raksa aser Indian Consulate telung nungji Khalistani wako ana asong. Iba sülen longkak aiter telok ka Consulate telung jagi ia insang agi kishi aser kichiba raksatsü.

Iba tatalokba aija Indian-American lenir, Ajay Bhutoria-i,

"Iba ama mapa ajanga India aser United States tsüngda tesendaktep amokmerenba dang masü saka asen nüburtem tetünep nung aliba raksatsür," ta metetdaksü.

Bhutoria-isa ketdangsertem dang aibelenertem tekaraba nung pua temerenshi agüjang, ta akhangba den külemi sensotem dang yimjung aser tesünep ajungkettsütsü atema ajak longjemtsü ayongzük.

Foundation for India and Indian Diaspora Studies (FIIDS)-i sangdong ka ajanga, Vienna Convention kübok diplomatic missions kümzüka ayutsü atema nangzüka lir, ajisiüaka UK aser US nati tamakok anguba ya tebilemstü onük ka kümogo, ta metetdaksü.

FIIDS-isa, "Onoki Department of Homeland Security (DHS), FBI aser CIA ama ozüng benokba rejutem dang United States of America nung kiralongra malitsü mesüra kiralongra pusemertem nokdangtsü atema inyaksü mepishir," ta metetdaksü.

**"Chiyongtsü Kümdanga Amshitsübaji Külem Mapa"**

### Calcium Carbide Amshia Süngjang Mendaktsübaji Ozüng Anema Inyakba Mapa lir

**IBA JAGI TAYOKER ASER TALIR NA PRONGLA TIMTEMDAKTSÜR**

**TIM MESÜI KANGSHIA MENDAKTSÜBA SÜNGJANGTEM ACHIBA AJANGA TEMANG NUNG ITEM TIMTEM ADOKER**

\* Saksütsü \* Tebok Aotsü \* Azü Aotsü \* Tebok aser Teku Ronga Aittsü \* Kanga tzüratsü \* Tashimait akümtsü \* Chiyongtsü Memeyoktetsü \* Tenük ashitsü \* Teküp nung komolongra adoktsü \* Tebang, Teni aser Terok mesaktsü \* Akettsü, Terok ashitsü, Asara Atutsü \* Tango Mesaputsü \* Komo Tamajung, Cancer, Temesen aser Tezüng tashidaktem adoktsü \* Temang tongti tezü nung kongshiba agi tokolak kanga menütsü \* Tezüngnük Ayangtsü \* Teputetla Memetet akümtsü aser Amatara bolutsü.

**Calcium Carbide Amshia Süngjang Mendaktsübaji Ozüng Anema Inyakba Mapa lir. Temerenshi ita trok tepuokdak ayutsü aser sen Rs.1.00 lakh senchi achitsü.**

**MOZÜ AGI KANGSHIA MENDAKTSÜBA SÜNGJANGTEM TECHI**

**PARNOKSASA AMENBA SÜNGJANGTEM DANG CHIANG**

*Issued in Public Interest by Food Safety Authority, Department of Health and Family Welfare, Govt. of Nagaland.*



## TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 21, 2022

### Takartem jaoker

**N**agaland government-i yaküm August ita nung Nagaland CSR & Investment Conclave sentong ka Kohima nung August ita nung ayongzuka akaba aser taküm 2023 küm taruba ita April tetenzüklen G20 (the Group of Twenty) senden ka Kohima nung adenshitsü aliba sentongtem ya Nagaland nung terenlok mapa tulu inyaksü nükjidong nung ayongzükba sentongtem lir. Aji oda, Nagaland government-i ayongzükba sentongtem rongnung tajangzük keta ataloktsüba mapatem rongnung senden sentong ana ya asütsü. Atangji, Nagaland nung ali rongsen maka masü kar saka asenoki asen rongsen agi tagitsü kuma mamshitetba ajanga takar chir agi sensaker kümer alir, anungji asen lima nung asenok akaba rongsentem agi tagitarutsü kuma yangluteta amshitettsü asoshi tangar takar aser temetetertem teyari nungdaker. Item teyariji aginüa asüngdangtsü aser aser nungdakba tesemtem sayutsü asoshi terenlok mapa tulu inyaker Corporate aser company-tem Nagaland-i jaoka jembir aser ano G20 senden nung adeni arurtem danga kasa teyariji aginüa asüngdangtsü Nagaland government tebilemba lir. Aji oda, Kohima nung G20 senden tashi alitsüsa maongka angubaji Nagaland asoshi temoatsü aru tenzüker asütsü imlar. Atangji, Corporate-tem dang parnok Corporate Social Responsibility (CSR) sen nungi Nagaland nung nungdak mapa inyaksütsü asoshi mepishibaji balaka, itemjibo parnoki dang mulungra angati yaritsü. Ajisüaka, timtem kaji tanü asüng Corporate aser company-tem meyong CSR sen amshitsübaji parnok sen saka parnok mulung masü center government-i mulungba dang inyadaksür, anungji tajungbo tajung saka jangramatem ka lir. Ano, CSR nungi aruba sen jagi teti atema rongsen poktetdak asütsüsa mapa tulubo meinyaktetsüa akok. Ajisüaka, tang G20 Summit mes?ra Global Investor Summit ama jaoka aliba ajanga linük nung company tulutem dang masü saka tangar bendanger limatem nungia pei sen agi Nagaland nung nungdakba terenlok mapatem külemi inyaksü asoshi sentong yanglutettsü. Atangji, tangar takartem jaoka asen lima nung terenlok mapa inyaksü asoshi parnok den jembitsübaji asen asoshi dang masü saka parnok asoshia tajangzük anguba mapa ka asütsüla, kechiyong Investor-temi inyakba mapatemjibo temeim agi angati inyaksüba mapa ka masü saka asenoka aser parnoka tajangzük angutsü nükjidong nung inyaksü. Aji oda, tilatiba agi company kati mesüra G20 nungi linük kati Nagaland state rangben ya Kisama ama raliwalirtem amongdak kümdaktsütsü asoshi sen crore meyirijang aika endoka inyakdi ta asüngdangtsüa akok. Aji, parnok asoshi tasak masü. Iba ama mesükba mapa Nagaland nung sen alirtem asoshibo teinyaksü aika lir. Ajisüaka, takartemi Nagaland nung kecha tarendak aser tetsükdak makai ajak ajangzüksüsa terenlok mapatem inyaktetsüsa state government-i tapet inyakyim sentong yanglutsüla aser alima tensa mapang junga kümdaktsütsüla. Aji oda, tangartemibo Nagaland nung aruagi pei sen endoka külem ajangzüksü atema terenlok mapa inyakner saka ali kiburtem tsütsü timtem adoker, ano telok teloki mapa metenzükdang alimelen meshir aser nisungtem jakla nung kecha temulung lemtettsüla masü reprangtetter ta atalokra, alima nung sen agia terenlok mapa meinyaktetsüba tesemji Nagaland kümadoktsü. Atangji, terenlok mapa inyaksüba ya sen akaba kijai masü saka tesünep aser yimjung tensa aser mulunglemtettsüsa aliba ochishirtem aliba tesem aser lokti nungdaker. Shitakba agibo, Investor Summit malidang tamasa asenoki asen lima tensa aser asenok jakla aser mulungsentsü tama tangari junger ta temulunglema bilemetsüsa yangluadoktsüla.

## OLEMSABANG

### 2023 NAGALAND ELECTION NUNGI TANGAZÜKTSÜ ASER TEBILEMETSÜ KAR

~ Dr. Limatula Longkümer, Serampore

Iba ocet nung tan tembangba election nung inyaktepba asadanga aser teinyaksü kar lemsateper.

#### A. 14<sup>th</sup> NLA Election asadanga (analysis)

1. Tan Nagaland election nung Party timtiba aser candidates timba contest asü. Congress party dak alaka, independent candidates dena party ajak nungi adokogo. Kasa party lenisüba nung ano küm 5 aotsüji, koda südina ta rataa bilemer? Oppositionless govt. masütsü ajaki sarasademdi, kechiaser opposition party takang alinungdang ruling party check sütettsü.
2. Tan election nung Lanur tajung aika contest süogo. Parnok declaration nung Naga lima yanglushitsu mangdang tajung aser nükjidongji shiogo aser sen meindoki fair and clean election nung ajemdaker noktak. Saka item sempet tajung aketer lanurtem aika tesasatsüka aser tapayutsüka nüburtemi meshim, kechiaser nüburtemi sen meyong pei senti vote yoka chiadok. Ano Naga nungeri asen lima yanglushitsu asoshi nübu tajung aser mangdang tajung aketter nungdak ta asübaji tangatetba kati maru, anungji election tetezü yi aser sen dang metet. Tarutsü nung lanur lenir tajung adoka Naga political melenshitsü ajaki sarasademdi.
3. Tetsür pezü contest asü aser item rongnung anati takok nguoko, mezüngbuba Naga lima nung tetsürtemi jenjang tulu ngutetba atema pelar. Tena lenisüba ajanga tetsürtem asoshi temelenshi bener arutsü imla atadi. Ajioda saka tetsür anajia sen agi alizüker adoker rongnung aden nungbo clean election tsütsü nungibo tebilemdangtsü ka lir.
4. Nagaland election nung tongtipang instrumentji sen, muscle power, alcohol, drugs aser item denji underground nexus. Tan election nunga itemji temai jateta adokogo, aser public-i pa/la vote jenjang temaba nung yokogo, aser adulterated yi talubosa "dry state" nung amshitepogo. Anungji candidate tajung majung tendanga shimtsübaji chance mali, saka sen aser tashiyim agi candidate shimer.
5. Candidate shirnok adokogo, parnok timbaka sen aser tashiyim (money and muscle power) ajanga election nung takok nguogo. Candidate-tem ajak meyokteper Sen crore kwi endoker alitsü? Aji Naga lima küm 5 terenlok sen ta metetdi. Election nung sen meshia chiadokji development kangabo meimlatsüla, kechiaser crore menden nung tadokertem sentsüh aotsü aser taruba election atema bendentsü nungdaker. Terenlok atema mapang aser sen peria mali.
6. Fair and free poll polling station kar dak alaka maliasü. Yimtsüng aika nung yimteni dang yimer ajak indang vote temer par senso candidate nem agütsüba, yim kar nung party kari coup süadok, tangar partybo pei vote magütsütet, proxy agütsüba, item ajak dangji election corruption ta ajar, aser pei senti vote sen agi ayokba ta ajar. Election nung bendenba sen jagi ita kwi achitsü?
7. Iba election nung amangba nüburtemi Tsüngrem kanga atala sensatsüogo. Sen agi pei vote yoka achiba, yimer senso candidate nem vote temer dang agütsütsü yur Tsüngrem dang lumia sarasademba. Yamala anemsü sarasademji Tsüngremi mepelar aser magizüker ta metetdi.
8. Clean election atema kanga meranga noktak saka pei adianu, yimer candidate alinung tatem nungbo aikati tasü itta menoktaket.
9. Saka Naga nunger rongnunga karbo tangatetba tajung lia candidate dang sen meshia machi, ochi nung tatem tashi noktak. Itemji kuli tajung lir, kenübo Naga lima nung ochi aser temerük election arutsü tezü medangi imla lidi.

(Maneni yashi adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Nüngtugu sayutsünger, asür Billy Graham'er ki ka pastor tem tanela nung arangshitsü atema amshitsü. North Carolina kübok Montreat nung aliba ki ya Billy Graham aser Ruth Graham na indang mezüngbuba ki liasü. Iba kidang pastor tem aser missionary temi tanela nung arangshia Tsüngrem O tarok metetba ajanga Tsüngremer sentong angatettsü. Küm 20 dak tema missionary mesüra pastor inyaker temi Billy's Home Place nungji amongtsü akok aser iba atemaji sen magitsü.

## Iran nunger aika Armenia linük nung jenoka Khristan yimsü agizüker

**March 20, 2023:** Tang Iran linük tesem ajaklen lenla aika nung makmakshishi adoka lir aser tesüiba ita aika nüburtemi sorkar anema longkak aitiba mapang nung nisung 500 dak tema süogo.

School tanurtem noklang aika miim chisema hospital nung amonger; iba ama makmakshishi tulu aliba mapang ka nung aikati linük toktsür jena aotsü meranger.

Nisung meyrjang aika north tsütsüleni jena aoer, aser parnok aika Armenia-i oa jenoker, kechiyong region nung democracy linük ishika rongnung Armenia densema lir.

Talisa Iran arrtsülen rara manener. Russia-i Iran den kanga shishilembar aser raraba hadir aika iba tesem ajanga Ukraine-i belener.

Iba ama tensa ka nung Khristantem densema reshikangshi ajangshiba Iran nunger jenoktsü atema tesem tajungtibaji linük tila- Armenia dang lir.

Gateway Missions nungi Pastor Jacob Pursley-i, "Yangi nenoki iba ayong angr, aser iba ayong dang Arax ajar. Arax ayong ya Armenia aser Iran na arrtsü ladangba lir. Ano anüolen-a iba ayong ya Turkey aser Armenia tsüngda arrtsü

ladangba lir," ta metetdaksü.

"Iran nungbo yimsü meyipdaksütsü merangbaji ozüng alema lir. Anungji Khristan ka ama nai Iran-i oa Khristan yimsü indang lemsateptsü makok. Nü ket nung Persian oshi nung Laishiba-a ayutsü memelatsü. Anungji Persia nungertem Armenia Khristantem dangi arua Khristan yimsü indang asüngdang. Tenla ki ka bushitsü, Laishiba ka bushitsü aser yimsü indang asüngdangtsü atema parnok Armenia nunger ajurur. Ibayongji anogo shia parnok meyrjang aikati iba arrtsü adena arur," ta pastor Jacob-i metetdaksü.

"Iran nungi arurtem aikati Khristan ka ajurua yimsü indang asüngdangtsü yongyar. Yamaji nisung noklang aikati Yisu Khrista dak amanga agizüker. Parnoki angazüksü atema sayutsünger mesüra evangelist nüngdaker. Parnoki Laishiba azüngtsü yongyar, kechiyong Iran nungbo parnok ket nung Laishiba ayutsü memelar," ta pastor-i metetdaksü.

Ajisüaka Iran linük toktsür jena aotsüji temela masü, kechiyong memetetba lendong balala ajangshir. Tawa-a Iran nunger bus ka sünga mener Armenia yimtiba, Yerevan-i jena aoba mapang

adang ka nung aludang bus nungji mi adoka lendong ataloka liasü. Iran toktsür ajenyonga Iran nung parnok toktsüba kibong züngsemtem aser medemertemibo timtem ajurutsüsa akümer.

"Armenia nung alir Iran tsür, Ghazali-i onok dang, 'Küm pezü tejaklen Shiraz University nung ni 'hijab' (tejak meyrbangba sü) agizüka atema kü dak züka liasü. Iran nung talisa tetsürtem kanga timtemer, tashiyim amshia raksatsür aser amokmerener ta ashi," ta pastor-i metetdaksü.

Tang Iran nung iba ama tensa ka nung pastor Jacob aser par team-i Armenia nung akokba tashi Iran nungi aruba refugees aika jenokdaksütsü atema renemer.

Armenia nunga Azerbaijan-i timtem agütsüba den külemi Russia aser Ukraine nunger aika Armenia-i jena arur. Bendangertemji kechi linük nungi südir süaka Jacob aser par tem-i ajak pelashishia agizüker.

Pastor Jacob-i, "Kibubai Par tesamaba santem Iran nungi Armenia-i arutsü atema sarasademjang, ibaji ajanga parnok Kibuba angutsü. Kibubai Par santem asen Arogotemi anir arutsü atema sarasademjang" ta mepishia metetdaksü.

## ANO GO ABEN TSÜNGREM DEN

### JUNGGUNGA MEYOKTEP

"Aser ochi nungi parnok tenarong meypa otsü dangi aotsü, ibala mapang arutsü. Saka nai ajak nung teshisadang liang, timtem aremang, sayutsünger mapa inyakang, ne tenzükba mapa abensajang!" (2 Tim. 4:4,5).

Yohan Baptitsüba pa mapa nung kanga nendaka jangraba tenzük ka liasü. Kwikati Yohan ama tenzük parnok ajak Yisu sülen anidakertem aküm. Tanü azüngba Lai nung ajemdaker Yohan Baptitsüba aser tanü Khristan tenzükertem temetemdangba kar agütsür.

1. Yohan tetsü pok nung alidang nungi Tanela Temeshi agi sünga liasü, saka tanü sayutsünger temi shirnok teperi ogo parnok tanela den sendakteper. Tsüngrem O pa dangi aru (Lk. 3:2); saka parnok dangi jungkai adokba aika zülua aliba Tsüngrem O den meputeper. Pa lisem lima nung alir ka, nüngtuku aginüba ajak nungi pilaa liasü, mepushi (Mt. 3:1); saka parnok yimti nung alitsü meimer, aser konang bushir.
  2. Yohan Tsüngrem nungi aruba ola ka liasü (Yn. 1:23), saka tawa tanü sayutsünger temesüktep kar ola ongetang lir. Pai tenla sapang mebushi saka nisungtemi pa bushi anungji pa osangji tangar den memeyoktep (Mt. 3:5, 6); saka parnok tenla sabang bushirtem lir aser parnok sayutsünger dang parnok osang tajang masür aser tanaben majar.
  3. Kodang nisungtemi pa nungi angashi parnok temenen nungi temulung meyip (Mt. 3:6); saka kodang nisungtemi parnok nungi angashir parnok parnok nem tenüngsang agütsür. Pai obendangba yakta arutsü ta ashi aser tangashirtem kümdangdaksür (Mt. 3:10); saka parnok tarutsü temoatsü, azükaru indang jembi aser parnok temulung lemdaksü.
  4. Pai temulung memeyipba yimsü nung lenirtem dang per chirtem ta aja (Mt. 3:7); saka parnok temulung memeyipba lenirtem dang parnok tashi mait aser nüngdak mashir.
  5. Yohani Alima Tesangwa asoshi kuli asü (Yn. 1:8,9), saka tawa tanü ainkartem mangdang nung asüakümer. Pai Yisui temenen bener Aosang aser Temeshitetsür ta sayu (Yn. 1:29; Mt. 3:12); saka parnok Yisui tebilemstütem Bentettsür ka dang ta sangtonger.
  6. Pai sayatonya kecha meinyak saka Kibuba asoshi nüburtem renemdaksü (Yn. 10:41; Lk. 1:16,17); saka parnok sayatonya nung jangrar aser nisungtem memelenshi toktsür. Pai nüburtem dang parnok akaba nungi noklang shilem nung tenembo sensaker nem agüjang ta ashi (Lk. 3:11); parnok nübur dang parnok ter shilem agüjang ta ashir aser parnok temoatsü aginüra tenla agüjang ta zülur.
  7. Chubai nüktapangtaba asoshi pai chuba arutsü (Lk. 3:19-20); parnok ochi mashi politician nem tenüngsang agütsür aser parnok maongka bushia sübokrem agütsür.
  8. Pai ashi, "Pa (Yisu) ulutsüla, saka ni asotsüla" (Yn. 3:30); saka parnok Yisu tenüng nung parnok dak rangloker. Pai Pa nütüngtem dang sarasademtsü sayu (Lk. 11:1); saka parnok parnok nütüngtem dang kechisarena ajak ratetta zülutsü, atangji tenlaa dena, ashir.
  9. Pai chiyongtsü tongmelang chiyongtsü chiyong aser tongmelang sobutsü sobu (Mt. 3:4); saka parnok lalushibonga sobur iba jagi tongmelang tamanger ratadaksür.
- Ni alidak Yohan Baptitsüba ama tongmelang taküm lia Alima Tesangwa asoshi ochi kuli süa alitsü yariang, Oba. Amen.

## China-i Uyghur nunger Khristan pastor ka jail nungi chiokogo



Pastor Alimujiang Yimti

**March 20, 2023:** China ketdangsertem Uyghur nunger Khristan pastor ka küm 15 jail nung puokba sülen chiokogo; telesa adokdaksüba aser bendanger organization balala den linük miim osang prokba ken o nung pai aija jail nung puoka liasü.

Arrshi küm 49, pastor Alimujiang Yimti chiokba sülen par kibong den tanaben

longjemogo. Pa ya Protestant house church ka nung pastor inyaker.

Xinjiang region yimtiba, Urumqi nung aliba jail ka nung pa puoka liasü, ta China Aid osang ajanga metetdaksü.

Yimti ya mezüngbo Muslim nunger liasü saka 1995 küm pai Khristan yimsü agizük. Xinjiang province kübok Kashgar yimti nung aliba Protestant house church ka nung pa pastor inyaka liasü. Iba Arogo nung züngsemtemji Uyghur Khristantem lir.

2007 küm nungi China nunger security agency balalai Muslim lisopur Uyghur nunger dak tenük yoker. Iba mapang nungji region nung nütüng million 26 nungi Khristan Uyghurs nütüngji shilem 2 shi liasü, ta Aid to the Church in Need-i metetdaksü.

Yimti-i pa business amshia Kashgar nung Khristan tangatetba proker, ta mezüng pa

nem tai tonglokja liasü, iba sülen pai telesa adokdaksütsü atema inyakra den külemi bendanger organizations den China nunger miim osang proker, ta tai tonglokja 2008 küm January 12 nü pa pua liasü.

Talisa pai America nunger Khristan medemer ka den jembiba atema pa nem tai tongloktsü, ta China Aid-i metetdaksü.

Pa anema ken o anaben angadanga liasü aser tatema 2009 küm August ita nung pa anema obendang agüja küm 15 tepuokdak ayutsü oshidang agütsü.

Pai iba obendang anema temepishiba agütsü saka magizük.

Khristan temeden atema inyakra telok balalaibo, China ketdangsertemiyazü nung pastor anema ken o benok, ta aitsüogo.

Pastor apuba aser jail nung

puokba ajanga par kibong küm aika kanga timtema aruogo. Pa kinüngtsü, Gulinuer-i kanga timtema par tanur ana mesütet, ajisüaka Khristan telok balalaia par kibong yaria liasü, ta Release International-i metetdaksü.

Release International-isa, tesüiba küm aika Uyghur Khristantem kanga reshikangshia aruogo, ajisüaka item ama osangji jungkai madoki liasü, ta metetdaksü.

United States Commission on International Religious Freedom (USCIRF)-i ashiba agi, Yimti ya Khristan asüba aser mission mapa inyakra ajanga ketdangsertem apu, ta metetdaksü.

Aso 12buba aser 13buba mapang nung Uyghur nungertem Khristan osangtanjung angashia liasü saka Aso 14buba mapang nung parnok aika Islam yimsü dangi meyipba ajanga Khristan yimsü samaadok, ta Aid to

Church in Need-i metetdaksü.

Ano asentenshir 1892 küm nungi tenzuka Lutheran Swedish Missionary Society-i Uyghur nunger den Khrista osangtanjung lemsatepa liasü aser 1930s mapang tashi nungbo Uyghurs nunger 300-i Protestant dangi meyip.

Yimti anema ken o angadanga aser tai tonglokja jail nung puokba osang ya jungkai adokba ajanga China-i Uyghur Khristantem reshikangshiba alimai meteta kümogo.

Meimchir temeden atema inyakra teloktemi ashiba agi, tang Uyghur nunger den Kazakhs aser lisopur minorities million 2 shi "re-education camps" nung puoka lir.

Uyghur Tribunal-i ashiba agi, item camps nung alirtem kanga reshikangshir, kangshia mapa tasak inyakdaksür aser tanur masotsü atema concentration camps nung 'sterilize' sütsür.

AO OSHI ANGAZÜKDAK:

TANÜ ANGAZÜKTSÜBA OJANG

Perlang

(n) ki asüdang kilem nendaksü atema tongnü nung alenlokba süng talang (long pole fix at side posts in house building to support rafters of the roof)

\* Ki asürtemi tongnü ajak amshia perlang akangkanga alenloka aoer.

Pesaperong

(n) mesüngjemtet, minprong (restless)

\* Merila alidak nisungtem kanga pesaperonger.



OLONG PAITEP # 6462

Grid for OLONG PAITEP # 6462 with numbers 1-24 in a crossword pattern.

TIPIEN

- 1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. \_ \_ \_ tatsu - (3)
12. Tebur kidong aser zünga kasa süngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6461 TELANGZÜBA

TIPIEN :

- 2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



COMPANY KA NUNG CHARTERED

ACCOUNTANT ATEMA INTERVIEW AGIR :

Boss : Na qualification atema documents meperia, tesadang ka dangato ya, tanüngba paperji Kwa?

Applicant : Tanüngba paper atemaji nai Rs.2000/- agütsü nung ang sayutettsüa, sir.

Boss : Very good, asüng nungi na mapai arung no?

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

Cachar police-i Burmese kozüjang seret 20,000 apu



Cachar police-i Bharat Petroleum tanker ka nung Burmese kozüjang miima bena aliba apudang agiba noksa angur.

Guwahati, March 20, 2023

(Agencies): Assam Chief Minister-i kümdangtsü shiaka Burmese supari syndicate-i maneni mapa inyaker.

Cachar police-i Burmese kozüjang ton 20 shi puogo aser iba dak sendakba nung nisung 10 apu aser ano nisungtem bushitepar.

Cachar police-i oziung alema shibelenba maparen ajak mita arudar, ta SP Cachar Numal Mahatta-i ashi.

Yasüng SP Numal Mahatta den Sadar OC Amit Kumar Singh aser Tarapur IC Raju Dey nunger adenba police telok kati truck gari ana den gari tila 8 sot.

Iba mapang Bharat Petroleum tanker ka nung Burmese kozüjang 20 tons tema bena aliba putet aser iba indang jenjang ya Rs 1 crore tema lir.

Bharat Petroleum tanker nung secret chambers 4 yanglua liasü aser iba nungji

Burmese kozüjang miimba miima bena liasü.

Iba dak sendakba nung apurtem ya Assam kübok tesem balala nungi lir. Parnok ya Jalalpur nungi Pinku Das, Silchar nungi Izaz Borbhuiya, Silchar nungi Parimal Das, Barpeta nungi Babul Sikdar, Barpeta nungi Mazidul Ali, Hawly nungi Azibor Sikdar aser Dholai nungi Khalil Ahmed nunger ta jangjaogo.

Assam HSLC paper leak asüba atema tesayur ana tepuokdak ayur

Guwahati, March 20, 2023

(Agencies): HSLC paper leak asüba ken o nung tai tonglojka aliba tesayur ana tepuokdak yuogo.

Tesayur ana ya Jyotirekha Borgohain aser Hrambo Kumar Das na lir aser tena tanü okdaki anir ao.

Tenaprong ya Bhauri Devi Sarawgi High School nung inyaker. Borgohain ya Controller of Examinations aser Das ya taoba Assistant Controller of Examinations lir.

Taoba mapang Guwahati

nung okadak kati tena CID police ket nung ayutsü temelaba agüja liasü.

Maneni, HSLC question paper leak asüba ken o nung Assam kübok Lakhimpur nung tesayur asem Crime Investigation Department (CID) ket nung anogo 10 nü ayutsü temelaba agütsüogo.

Par asem ya Kumud Rajkhowa, Pranab Dutta aser Prasanna Das nunger ta jangjaogo aser March 18 nü Chief Judicial Magistrate (CJM) court tsüngdangi anir oa

liasü. Külen, Board of Secondary Education, Assam (SEBA) nung Controller of Examinations Nayan Jyoti Sarma tanü CID headquarters-i aru.

HSLC question paper leak asüba ken o asüngdangtsü atema CID-i Nayan Jyoti Sarma jaoka liasü. Pa den külemi Kushal Das ta ser clerk ka aser security guard ka CID-isa jaok.

CID ketedangtsürtemi SEBA nung mapa inyaker nisung asem dang asüngdangya südar.

Tripura BJP-i PM Modi nem Lok Sabha menden anaprong agütsütsü

Agartala, March 20, 2023

(Agencies): 2014 Lok Sabha election nung Tripura BJP-i Prime Minister Narendra Modi nem Lok Sabha menden anaprong agütsütsü ta Tripura BJP president Rajib Bhattacharjee-i ashi.

Rabindra Satabarshiki Bhavan nung BJP sentong ka nung jembidang Bhattacharjee-i iba osang metetdaksü.

"Tawa Assembly elections

nung asenoki takok nguogo aser tang Tripura BJP-i PM Modi nem Lok Sabha menden anaprong agütsütsü atema tebilemtsü abentsüla" ta pai ayongzük.

Assembly election nung BJP-i menden 10 teküpok ang angutsü ta opposition party temi jembisa saka parnok ang menden 10 teküpok nguogo, ta Bhattacharjee-isa ashi.

"Parnoki sorkar akümtsü

temeten mali kechiyong parnoki state renloksü atema masü saka parnok nija atema dang bilema inyak" ta paisa shisem.

Tripura BJP-i tashimaitba metettsü merangtsüla aser 2024 Lok Sabha elections nung takok tulu angutsü atema merangtsüla, ta Tripura BJP president-isa metetdaksü.

Iba senden nung Tripura Chief Minister Manik Saha aser par cabinet minister tem aden.

Meghalaya nung VPP-i opposition nung dang amentsü

Shillong, March 20, 2023

(Agencies): Meghalaya nung Voice of the People Party (VPP)-i opposition nung dang amentsü ta metetdaksüogo.

"National People's Party (NPP)-i onok sorkar nung adentsü jaoker saka ibaji onoki magizük" ta VPP president Ardent Miller Basaiawmoit-i

ashi. VPP-isa Khasi aser Jaintia Hills nung council elections atema renemer ta osang angazük.

NPP-i constituency ajak nung tokteptsü aser MP candidate ka shimtsü.

Regional party kati sorkar kümra onoki tatemzükba kar lia nungittsü saka MDC mesüra

MP atema tang VPP candidate ka danga mali, ta Basaiawmoit-i ashi.

VPP president-isa parnok independent ama dang alitsü aser opposition nung amentsü jangjatsüogo.

2023 Meghalaya assembly elections nung VPP-i menden 14 nung toktepba nungi 4 nung takok angu.

## Pak police-i Imran Khan anema kiralongraba ken o benok

**Islamabad, Metsüremi/ March 20 (Agencies):** Taoba Pakistan ato kilonser Imran Khan densema aliba ochimashi ken o ka court ka nung jembitsü lia judicial complex kiamlen ki-o-jen raksatsüba, security personnel dak teka sangshiba aser rongrong adokdaksüba mechi PTI lenir ter dak tema aser Imran Khan anema Pakistan police temi kiralongraba ken o ka Deobarnü benok.

Mapang talangka nungi yongya ataba Toshakhana ken o jembitsü atema Lahore nungi Imran Khan Islamabad-i arudang Honibarnü Islamabad Judicial Complex kima rongrong adoka liasü.

Pakistan Tehreek-e-Insaf party nung inyaker aser police tsüngta raratepba mapang security personnel 25 dak tema yiru, anungji Additional District and Sessions Judge Zafar Iqbal-i ken o ya March 30 tashi mejembitsü thinena liasü.

Ken o ya pua aliba PTI workers aser party lenirtem anema benok. Islamabad Police ajanga FIR benokba nung PTI lenir 17 shi tenüng agüja lir, ta Geo News ajanga ashi.

PTI party worker temi police check post aser judicial complex indang main gate raksatsü, ta FIR nung shia lir.

Ki-o-jen raksatsüba, long agi aonba aser judicial complex indang ki raksatsüba atema nisung 18 apu, ta FIR nung ashi.

Police indang gari ana aser motorcycle tenet rongdoktsü

asert station house officer (SHO) indang official gari ka raksatsü, ta shia lir.

Arishi küm 70 tain Khan ya Islamabad nung okadak nokdaksü atema Lahore nungi arua liasü. Pa meina pa bukumertem aru.

Iba ken o jembitsü asoshi pa Islamabad yutsür ainshir mapang tatsüka tsüngta Punjab police 10,000 dak tema Lahore nung Khan'er Zaman Park telungi ia par party worker aika apu.

Police temi power shovel amshia Pakistan Tehreek-e-Insaf party tekolakbar ki telungi aidak barricades aser süki indoktsü aser Toshakhana ken o nung Khan mepudaksütsü mechi pa busemer yangji adenshia aliba nisung noklang aika meindok.

Parnoki main gate aser jara raksatsüba sülen ki telung nung mita bushia ao. Ki telung nung PTI worker temi anema nokdaka rongrong adok. Iba mapang PTI worker ter shi yirua liasü.

Ozüng alema operation agiba nung adener police officer aser Khan'er kidang rongrong adokba atema party-i ken o benoktsü, ta PTI lenir Fawad Chaudhry-i Deobarnü ashi.

"Tanü legal team senden ka menogo. Lahore High Court ajanga Imran Khan'er kidangi maitsü telemetba agia aliba sülen manidaki police temi inyakba ajanga ozüng raksaogo. Osettsüset auya.

Parnoki juice box tem bener ao. Tai maket nisungtem merenshi," ta pai tweet asü.

"Court totuyuba sülen manidakba ya tatok agütsüetla mapa masü. High court-i obendang agütsüba wazüka ayutsüla. Iba maparen nung shilem agiba police officer ajak anema ken o benokogo," ta pai ashi.

Hokulbarnü Imran Khan ya Lahore High Court nung nokdak aser pa anema ochimashi ken o ketdang asüsang Additional District and Sessions Judge (ADSJ) Iqbal matsüngdang Honibarnü nokdaksü renema lir ta ashi.

PTI tekolakba ya ato kilonser inyakba mapang state depository, Toshakhana nungi jenjang tulu aketba Graff wristwatch densema sempet balala alir tajangzük asoshi ayokba ken o nung shia lir.

1974 küm amenokba Toshakhana ya Cabinet Division indang administrative control kübok department ka lir aser yangji danga linük sorkar aser bendanger tongtipang nisung temi yimsüsür, parliamentarian, bureaucrats aser ketdangsür nem sempet agütsübatem rizünga ayur.

Item oset ayokba indang osang tejangja melemsatepba yong Election Commission of Pakistan ajanga taoba küm October ita Khan ato kilonser inyaksü metemsü kumdaksü. Iba sülen ECP ajanga pa merenshitsü atema district court nung ken o benok.

## National election agitsü atema Thailand parliament loksar

**Bangkok, Metsüremi/ March 20 (Agencies):** May ita election agitsü atema lenmang lapokja Thailand chuba Maha Vajiralongkorn-i parliament loksatsü atema pa tashi ka amshio, ta Royal Gazette sangdong ka ajanga metetdaksü.

House loksaba sülen election ya anogo 45 nungi 60 tsüngda agitsü nungdaker.

"Iba jenjang agiba ya chuba state tekolak ser democratic sorkar ka maneni amenoka yimden yimsüsüba dak sendakba nung telemetba agitsü tashi nübutem nem tanaben agütsüba ka lir," ta Honibarnü sangdong nung shia lir.

Election agitsüba anogo sangdonga mali, saka Deputy Prime Minster Wissanu Kreamgam-i Hombar anepdang ashiba agi, house Honibarnü loksara election ya May 14 nü agitsü akok.

Iba election ya 2014 küm coup sülen tanabuba aser 2020 küm lanurtemi anir Bangkok nung pro-democracy longkak aitba sentong tulu ka ayongzüka agiba sülen mezüngbuba election asütsü. Iba election ya billionaire Shinawatra'er kibong aser linük indang conservative pro-military establishment na tsüngda tetoktepba ka asütsü imlar.

Opinion survey balala ajanga

taoba premier Thaksin'er jala aser Yingluck Shinawatra indang niece Paetongtarn Shinawatra, Ato Kilonser mapa abentsü atema toktepertem rongnung temaba jenjang nung aliba sayuogo. Hopta tatemi sangdongba poll ka nung la point 10 tejangdang tua shilem 38.2 akümba sayuogo.

National Institute of Development Administration-i agiba poll ajanga Ato Kilonser Prayut Chan-ocha tasembuba jenjang (15.65%) aliba sayuogo. Pa 2014 küm nungi tang tashi PM lir.

Paetongtarn-i Hokolbarnü, lai election akoktsü temulung lema bilemer ta shio.

Office of the

### Tongpok Semchir Pongen Mungdang

H.Q. Mokochung: 798601, Nagaland

#### SANGDONGER

Tongpok Semchir Pongen Mungdang 2023 mezüng sanen luden meeting 28/3/2023 anogo nung treasurer Mr & Mrs. K. Rongsen Pongen, Mission Compound, kidang 10:00 am nungi tenzüka amentsü. Unit aser yimsüng balala nungi shirnokisa sanen luden nung member asütsü magütsü ali, iba anogo nung nisung tenüng den contact number bener arutsü mepishir. Iba anogo sanen luden ajak mapang shitak nung arua atentsü sangdonger.

Sd/-

Guru Bendangwati Pongen  
President

Sd/-

Meyatoshi Pongen  
Secretary

OFFICE OF THE

### KOHIMA WAMEKEN SENSO TELONGJEM TENÜNGSANG AGÜTSÜR

1. **Mr. IMLIMEREN IMSONG** (s/o Mr. N. Imti Imsong & Ms. S. Chubala Lkr) promoted to Assistant Registrar, Nagaland University, Lumami.
2. **Er. N. MOA LONGKUMER** (s/o Mr. Nuklugangshi & Ms. L. Akangkokla Ao) promoted to Joint Director, Administrative Training Institute, Nagaland, Kohima.

Nena mapa nung nendaka inyaka arur ano temaba mendeni atuba asoshi tenungsang tulu agutsur. Tsungremi maneni nena takum aser wadang mojangma.

Sd/-

Suponyanger  
General Secretary, KWST

### PELABA LEMSATEPER

Meimlaba mapang ka nung tia maka 14th February 2023 anogo ozü kibong nung kitsük kironng lendong tuluka ajura liasü. Iba mapang ana aser talang nungi Arogo, Yimden, lokti tentet balala, pur-medemer, kiyonger aser kinunger adianu shirnoki nübu, rongsen, shisatsü aser sarasadem agi nongita yariogo, nenok ajak dang tsüngdong arua kanga pelar ta meshitet nung iba osang kaket ajanga ajak dang "Kangasa Pelar" ta lemsateper.

Tsüngremi nenok mapa tajung asoshi maneni mojangma ta ozü tamang sarasadem.

Sd/-

Mr & Mrs. Sariangba  
Electrical Ward  
Changtongya Town

### TEPELA LEMSATEPER

Tawa agiba 14th Nagaland Legislative Assembly Election nung tembar, temolunger aser memetetteper temi akok tashi rongsen, shisatsü, sarasadem aser mapang agüja ni yariba atema iba sapang ajanga tepela lemsateper. Ni kü Team dang pelaba lemsateper, shirnoki pei akaba ajak agi nungdakba mapang angati yariogo. Iba tesendaktep, rongsen agi malizüktetba tesendaktep ya ni teti bilemtettsü. Ajak dang nung kanga pelar aser ajemalushir.



Tongpang temela masütsü ta asenoki kanga junga meteter nübuyim tenzü. Sen tashi amshiba system ka nung asenok tetsüng ajemok. Saka asenok lungjemer metsüboi nokdak, kechiaser temolungjang taroktiba nung taküm nung sen kisüng masü ta asenok ajaki amanga liasü.

Asenoki tangatetba tajung, tasü tait molungsentsü nung aseni akokba tajungtiba inyakogo. Asenoki asen nübur aser system tali tajungba nung angatetogo. Anungji election nung asenok tamakok ajuruaka asenok mesama. Aseni aginüba ochi aser yimya tajung nung alitsü jangraba tanüla Tsüngremi meimchir nem agütsüba aseni benjonger.

Asen Constituency tenüng nung nokdaksü asoshi asen lenir Jacob Zhimomi shimtetba atema pa nem tenungsang agütsür.

Aser temolungtetba tasen nung asen mangdang asoshi asenok lungjemer inyaksü aser asen metsü nungi süngjang tanga tanü aser aser asüng yimchiyimjung nung alitsü teimla ayur.

Temeim Nung

20th March, 2023

Sd/-

Imsumongba Pongen  
Ghaspani-1 A/CGOVERNMENT OF NAGALAND  
DIRECTORATE OF TECHNICAL EDUCATION  
NAGALAND : KOHIMA-797004

NO.DET/ESTT-2/5/2016-17

Dated, Kohima the 16th March 2023.

#### NOTIFICATION

Applications are invited from the interested In-Service candidates with eligibility criteria laid down below for admission to Degree Module course at North Eastern Regional Institute of Science & Technology (NERIST), Itanagar.

Sl.No	Particular	Requirements
1	Branch/Field	Mechanical Engineering (ME)/Computer Science Engineering(CSE)
2	Duration	3 years course
3	Minimum qualification	3 years Diploma with minimum 60% pass percentage from the Institute recognized/Approved by AICTE
4	Maximum Age	40 years as on 1 <sup>st</sup> August 2022.SC/ST and PH 45 years as on 1 <sup>st</sup> August.OBC and Woman 43 years as on 1 <sup>st</sup> August 2023.
5	Certificate of Undertaking	From the concerned Department that the candidate shall be sponsored for 3 years.

Selection shall be done purely on the basis of academic performance. Last date of submission of application along with all documents to the Directorate of Technical Education is on or before 10th April 2023.

SD/- (Er. Vipulhou Lhoungup)  
Addl. Director & HOD

## Carlos Alcaraz-i Indian Wells asayamung kokogo



Carlos Alcaraz

**Metsüremi/March 20, 2023 (Agencies):** Deobarnü Indian Wells ATP Masters 1000 final asaya nung Spain nung Carlos Alcaraz-i 6-3, 6-2 agi Daniil Medvedev madak takon nua pa world No. 1 asayar kümogo.

Medvedev asaya 19 tashi khen danga tamakok mongui asaya arua aliba US Open champion Alcaraz-i tembangtsüogo aser pai asayamung pezübuba atonga akoktsü aliba nokdangogo. Iba asayamung sülen temaba jenjang nung pai Australian Open champion Novak Djokovic atsüngtokogo.

Serbia nung asayar Djokovic ya Covid-19 vaccine magiba ajanga United States-i aittsü atema temelaba magütsü aser ibayongji pa Indian Wells nung masayatet aser iba hopta tenzüksü aliba Miami Open nunga shilem magitetsü, kong Alcaraz ya defending champion lir.

Taoba küm Flushing Meadows nung asayamung akokba sülen arishi küm 19 tain

Alcaraz ya No 1 asayartem rongnung tanobusang aküm. Pai tang agi Masters 1000 title tasembuba kokogo aser Rafael Nadal den külemi teenager asüba mapang iba title asem abenba asayar kümogo. Nadali küm 20 majung tsüngda trok koker liasü.

Final asaya nung Alcaraz-i kanga junga asaya aser Medvedev indang defence koba dang pai 'wall' ta ajar iba ya dena tongpoka oteta asaya.

Iba asayamung final masaya tsüngda Medvedev-i Rotterdam, Doha aser Dubai nung asayamungtem koker liasü, ajisüaka Alcaraz-i court ajunga nung winner züklojka asayaba pai menokdangteti liasü.

"Ni iba asayamung akokba atema kanga pelar aser anogo ter yamai asayatetba ya jangrademtsüka lir. Hau tanü asayatsü kanga tasak liasü," ta Alcaraz-i ashi.

"Tau tanü Daniil-i temaba jenjang nung masayatet, saka ni asayaba yimya aser asayamung tepeyong asayaba yimya dak kanga temulung

asür.

"Ni Miami nunga yamai dang asayaner," ta pai ashi.

Final asaya mezüngbuba set nung pai backhand winner ka züklojka Medvedev indang serve break asü aser pa 3-0 agi tejkadang aküm aser iba sülen mezüngbuba set ayong ayonga akok.

Tanabuba set nunga pai mezüngbuba point ter atonga akok aser pa 4-0 agi tejkadang aküm.

Asaya tepeyong nung pai break point ka danga majangshi aser iba asaya ya ghonda ka ser minute 11 nung kokatok.

Taküm menorang asaya tenzükaka Alcaraz No. 1 asayar kümogo. Pa yiruba ajanga Australian Open nunga masayateti liasü.

February ita nungi asaya tenzükba sülen Alcaraz-i Buenos Aires title benogo aser Rio de Janeiro nunga final tonga asaya liasü.

Ajisüaka pa temaba jenjang nungi masetshitsü atema Miami nunga kanga junga asayatsü nüngdaker.

## Sindhu-i anir Swiss Open 2023 asayatsü

**Metsüremi/March 20, 2023 (Agencies):** Küm tenzüker PV Sindhu tang tashi nung asayamung ka nunga danga junga masayateti arudar saka Mongolbarnü nungi tenzüksü aliba Swiss Open Super 300 asayamung nung la indang title defend asütsü imla lir.

Teburtem rongnung World number 9 asayar HS Prannoy shiba taoba küm iba asayamung nung runners-up liasü pa-a All England Championships nung tanabuba round nung tsükatokba sülen iba asayamung nung junga asayatetsü imla alitsü.

Ajisüaka pa iba asayamung nung takok nguyonga atutsü kanga melarabo masü, kechiyong pa mezüngbuba asaya 2018 world championships silver medallist China nung asayar Shi Yuqi den asayatsü, shiba taoba hopta Birmingham nung tanabuba jenjang nung tembanga liasü.

Taküm India nung kija asayartem rongnungi Prannoy-i tajungba asaya arudar saka

Sindhu o Lakshya Sen nabo tang tashi asayamung ka nunga danga junga masayateti arudar.

Sindhu shiba yirur mapang talangka masayateti liasü pa Korea nung coach Park Taesang dena pilaogo aser taoba hopta-a mezüngbuba round nung China tsür Zhang Yi Man-i tsükdakja liasü.

La iba asayamung nung mezüngbuba asaya local asayar Jenjira Stadelmann den asayatsü ata lir.

Tebur kija asaya nung Sen shiba Malaysia aser India Open nung mezüngbuba round nung tsükatok pai taoba hopta All England asayamung nungbo mezüngbuba round-bo akok ajisüaka taoba world number 2 aser world championship nung medal ana tashi ngur aliba Denmark nung asayar Anders Antonsen-i tsükdakja liasü.

Pa iba asayamung nung Hong Kong nung asayar Lee Cheuk Yiu den mezüngbuba asayatsü aser iba asaya kokra

külem India nung asayar Kidambi Srikanth den asayatsü akok, shiba mezüngbuba asaya China nung arishi küm 23 tain asayar Weng Hong Yang den asayatsü.

All England Open nung küm anabuba atonga semifinal tonga asayaba sülen tetsür tarep asayar Treesa Jolly aser Gayatri Gopichand na iba asayamung nung mezüngbuba asaya Indonesia tsür Rahayu aser Siti Fadia Silva Ramadhanti na den asayatsü.

India nung tebur tarep asayartem rongnung temba jenjang nung aliba tarep Satwiksairaj Rankireddy aser Chirag Shetty na mezüngbuba round nung qualifying round nungi main draw-i aitiba tarep ka den asayatsü.

Maneni tebur tarep asaya nung MR Arjun o Dhruv Kapila aser Krishna Prasad Garaga o Vishnuvardhan Goud, aser tetsür tarep asaya nung Ashwini Bhat K o Shikha Gautam nungera iba asayamung nung shilem agütsü.

## Major League Cricket: Finch lenisüba nung San Francisco team asayatsü

**Metsüremi/March 23, 2023 (Agencies):** United States nung Twenty20 asayamung tasenba Major League Cricket mezüngbuba nung taoba Australia captain Aaron Finch lenisüba nung San Francisco Unicorns asayatsü. Kasa mapang nung South Africa nung asayar Quinton de Kock-a Seattle Orcas nung asayatsü. Deobarnü Major League Cricket's (MLC) 'Domestic Player Draft' sangdongba mapang bendanger asayar trok shimba rongnung Finch aser De Kock na densema liasü. Asayamung nung team trokpronglai U.S nung amendaker asayaba asayar tekuku shimogo.

"@MLCricket @SFOUnicorns nung shilem agütsü yongya atar," ta Finch-i tweet asü, shibai taoba ita internasional asaya nungi anenba mesangdong tsüngda Australia team captain mapa benogo.

Arishi küm 36 tain asayar den ya taoba mapang team mate Marcus Stoinis aser Victoria fast bowler Brody Couch nata Unicorns nungi asayatsü. Brody tetsü ya America tsür lir anungji iba ajanga pa iba asayamung

nung asayatsü atema temsüa kümdaktsüogo.

Fast bowler Liam Plunkett, shiba 2019 küm 50-overs World Cup akokba England team nung densema liasü pa-a Unicorns nungi asayatsü. Plunkett kinungtsü ya Amreica tsür lir.

De Cock shiba lenisüba nung taoba mapang South Africa team format asemprongla nung asayaogo, pa Orcas nung Australia nung all-rounder Mitchell Marsh den külemi asayatsü.

Kasa mapang nung DC Freedom-ia bendanger asaya ana alizükba sangdongogo. Parnoki Sri Lanka nung all-rounder Wanindu Hasaranga aser South Africa nung fast bowler Anrich Nortje na alizükogo.

Taruba hopta ishika tsüngda bendanger asayartem anisemba sangdongtsü.

Draft nung U.S. internationals Monank Patel aser Steven Taylor na MI New York-i alizük aser taoba Canada captain Nitish Kumar Los Angeles Knight Riders-i alizüka liasü.

MLC asayamung ya July 13 nungi 30 tashi Dallas nung asayatsü.

## WTA Ranking nung Elena Rybakina tejk dangi tuogo

**Metsüremi/March 20, 2023 (Agencies):** Wimbledon champion Elena Rybakina-i Indian Wells asayamung akokba sülen Hombarnü sayaba WTA ranking nung jenjang asem tejk dangi tua tang tenetbuba nung lir, koba la indang career nung tang tashi nung jenjang tajungtiba lir. Kazakhstan tsür la yagi Deobarnü final asaya nung Australian Open koker aliba Aryna Sabalenka koka liasü.

"Nükjidong tulutibaji temaba jenjang atongtsüba lir, ajisüaka ano ibaji ajangzüksü atema talangka lir," ta Rybakina-i ashi.

"Tang atemabo ni tenetbuba nung lir ajisüaka ranking kanga kara melenshir. Anungji ni taruba asayamung nung

rangloker asayatsü nüngdaker. Ni ranking indang kangabo mebilemetsü meranger."

"Iba indang mebilemer, saka stat kanga junger," ta lai ashi.

"Ni shiba den asayadir asayaka ni ranking indang mebilemetsü meranger. Ni takokba tashi tajungtiba asayaner aser tatem nung asaya akoktsü meranger," ta laisa shisem.

Taoba küm Wimbledon nung Russia aser Belarus nung asayartem masayadaktsüba ajanga ranking point magütsüba agidang ashi la tang dang nungi temaba jenjang nung lila.

Semi-final nung Rybakina mekoki tang agi tanabenbuba atonga Indian Wells mekoktetaka Iga Swiatek maneni temaba jenjang nung lir.

### WTA TOP 20:

1. Iga Swiatek (POL) 9,975 pts
2. Aryna Sabalenka 6,740
3. Jessica Pegula (USA) 5,605
4. Caroline Garcia (FRA) 4,990 (+1)
5. Ons Jabeur (TUN) 4,976 (-1)
6. Coco Gauff (USA) 4,401
7. Elena Rybakina (KAZ) 3,720 (+3)
8. Daria Kasatkina 3,375
9. Belinda Bencic (SUI) 3,360
10. Maria Sakkari (GRE) 3,191 (-3)
11. Veronika Kudermetova 2,470
12. Petra Kvitova (CZE) 2,377 (+3)
13. Barbora Krejčíková (CZE) 2,324 (+3)
14. Beatriz Haddad Maia (BRA) 2,276 (-1)
15. Liudmila Samsonova 2,191 (-3)
16. Victoria Azarenka 2,182 (-2)
17. Karolína Plíšková (CZE) 2,155
18. Ekaterina Alexandrova 2,005
19. Magda Linette (POL) 1,770 (+2)
20. Donna Vekic (CRO) 1,662 (+3)



Iga Swiatek



## BILEMDANGANG

"Nai minyak tashibo kecha mataloktsü."